



لبنات
Only for girls
وبس

د/مصطفی زاید



للبنات وبس

- ٣ حياة جديدة ♥
- ٣٢ معاني الأنوثة ♥
- ٤٦ قسمة ونصيب ♥

- جمع وترتيب -

د / مصطفى إبراهيم زايد



رقم الإيداع
٢٠١٠/١٥٥٣٥

دار النعيم
للنشر والتوزيع
٠١٠٠٣٤١٨٧٨٤

♥ حياة جديدة ♥

مش حاسه بطعم للحياة ؟؟؟؟؟

تجبي تطلعي رحلة فين ؟؟؟؟

♥ طيب تعالى نعلم سوا .. و أي حلم ؟؟؟!

ده أحلى حلم فى حياة كل واحد فينا ..

هاخذك معايا مكان مختلف تماماً .. مكان كل

الناس سعيدة فيه .. الكل فرحان ومرتاح البال ..

مكان كله حب في حب ... الحب الحقيقي بجد ..

هاخذك و نروح الجنة ..

♥ ومهما حلمنا أو حاولنا نتخيل الجنة ، مش هنقدر!
► عارفة ليه ؟؟؟؟؟؟ ◀ لأن فيها ما لا عين رأت ،
ولا أذن سمعت ، ولا خطر على قلب بشر !!

♥ تعالي نشوف حبيبنا النبي ﷺ وهو بيوصفنا
بعض نعيم الجنة ؛ علشان نشتايق ليها بقلوبنا ونجتهد
علشان نفوز بيها قال رسول الله ﷺ :

» يقول الله ﷻ : أعددت لعبادي الصالحين
ما لا عين رأت ، ولا أذن سمعت ، ولا خطر
على قلب بشر ، ثم تلا النبي ﷺ قول الله ﷻ :

(فَلَا تَعْلَمُ نَفْسٌ مَّا أُخْفِيَ لَهُم مِّنْ
قُرَّةِ أَعْيُنٍ جَزَاءً بِمَا كَانُوا يَعْمَلُونَ)

[سورة السجدة : ١٧] << (١)



(١) رواه البخارى ومسلم



♥ في الجنة .. حاجات ولا في الأحلام ..

♥ ما لا عين رأت .. حاجة مفيش حد قبل كده

شافها ولا حتى في الخيال ! حاجة جمالها ميتوصفش !

♥ ما لا أذن سمعت .. أصوات روعة عمرك

ما سمعتها ولا حد سمعها قبل كده !

♥ ولا خطر على قلب بشر .. يعني مفيش

حد في الكون كله يقدر يتخيل النعيم ده !

✓ أصل ربنا هو اللي أعدّها ..

تخيلي بقي دي جمالها شكله إيه؟!

♥ النبي ﷺ والصحابة حطوا الجنة قصاد عينيهم ؛

وعلشان كده قدروا يصبروا ويستحملوا أي مشكلة أو

إبتلاء في الدنيا ، وضحّوا بكل شيء علشانها ..

✽ مين فينا هيصبر زيهم علشان يفوز بيها ؟!



♥ باللاينا نروح الجنة ..

♦ **أهل الجنة :** متميزين جداً في الآخرة زي ما كانوا متميزين جداً في الدنيا .. كانوا متميزين في الدنيا بامتثالهم واستسلامهم لأوامر ربنا ﷻ ، كانوا بيحبوا ربنا بجد، مش كلام وخلص.. فعملوا كل اللي بيرضيه حتى ولو كان صعب شوية على نفوسهم ، وتركوا كل اللي بيغضبه حتى ولو كان شئ بيحبوه ..!

« أول ناس داخلين الجنة ، النبي ﷺ وصفهم بالقمر ليلة البدر، والناس اللي وراهم نورهم زي نور الكواكب في السماء !! ياآآآآآه على الجمال والروعة !!

إنتي متخيلة الكلام؟؟ مش نفسك تكوني منهم؟؟

♥ **مش نفسك تكوني بدر يوم القيامة؟؟**

« حبيبك النبي ﷺ بيوصفهم ويقول :

» **إن أول زمرة يدخلون الجنة على صورة القمر**

ليلة البدر ، والذين يلونهم على أشد كوكب دري في

السماء إضاءة « متفق عليه



♦ **جمالک فی الجنة :** فوق أي جمال تتصوریه !!
 الحورية فی الجنة جمالها يفوق أي وصف تتخیلیه ،
 أنتی هتبقى أجمل من الحور العین فی الجنة !

❖ **یعنی أنتی ملکہ فی الجنة** ❖

◀ مش مشتاقہ إنک تعيشي الحياة دي ؟؟؟؟
 إحنا مش عايزين ندخل الجنة وخلص ؛ إحنا عايزين
 أعلى درجات الجنة ؛ ✓ عايزين الفردوس الأعلى ..
 أصل الجنة درجات.. وطالما عايزين أعلى درجة ؛
 يبقى لازم نتعب شوية ونصبر علشان نفوز بيها ..
 ✓ **زي الطالب** اللي بيقد يذاكر ويسهر ويتعب ،
 بس كله بيهون لما بيلاقي نفسه آخر السنة من الأوائل!



♦ **أعظم نعيم فی الجنة :** أجمل وأعظم نعمة فی
 الجنة یا أختي هي التلذذ برؤية ربك حبيبك ؛
 ربك اللي تعبتی علشانہ ، وصبرتي علشانہ ؛
 واستحملتي التريقة والسخرية والاستهزاء علشانہ ..



رؤية الملك وعجل

♥ قال رسول الله ﷺ : « إذا دخل أهل الجنة الجنة ، وأهل النار النار ، نادى مُناد : يا أهل الجنة إن لكم عند الله موعداً يريد أن ينجزكموه ، فيقولون : وما هو ؟؟ ألم يثقل الله موازيننا ويبيض وجوهنا ويدخلنا الجنة وينجنا من النار ؟؟ فيُكشف الحجاب ، فينظرون إليه ، فوالله ما أعطاهم الله شيئاً أحب إليهم من النظر إليه ولا أقرّ لأعينهم » صححه الألباني

♥ ياااااااااااااه ، مفيش شئ في الجنة أجمل ولا أروع من رؤية وجه الملك سبحانه وتعالى ، ربنا يرزقنا جميعاً رؤية وجهه الكريم ورضاه الأبدي عنا..



وبعد كل اللي قرأتيه وتخيلتيه ده ،،،

♥ يا ترى ممكن تبيعي كل ده بـ إيه ؟؟!

«أنا عايز أتكلم معاكي عن شئ مهم جداً في حياة كل مسلمة، شئ يميّز أي بنت مسلمة عن بنات الكون كله

❖ **عايز أتكلم معاكي عن ((حجابك))**

يووووووه !! تاني الحجاب!! طيب ما أنا محجبة!!

هقولك : إنتي اللي بتقولي على نفسك محجبة ،

« **إنها يا نرى إنتي فعلاً محجبة ؟؟!** »

« إحنا منقدرش نقول لأ؛ لأن فعلاً فيه حاجة ملفوفة على شعرك ، بس للأسف بالمنظر ده وبشكل اللبس بتاعك ده ، صعب جداً نقول عليه إنه "**حجاب**" !! »

~~~~~  
☒ **وقبل ما أكمل كلامي :**

♥ **أول شئ:** لازم تعرفي إن ربنا بيحبك .. أيوه بيحبك علشان يسّر إن الكلام ده يوصلك وتقرأيه ، دي تذكرة من ربنا .. فالحمد لله إن ربنا أرسل لك اللي يذكرك .. ولعل الكلمات البسيطة دي تكون سبب في تغيير حياتك للأفضل وسعادتك في الدنيا والآخرة بإذن الله..

♥ تاني شئ : إوعي تزعلي مني .. أو من الكلام ..  
أصل ده مش كلامي .. **ده كلام ربنا سبحانه وتعالى**  
**والنبي ﷺ الى حبهم بيجرى في دمي ودمك ..**

♥ يعنى لازم نتفق إن ده مش رأيي الشخصي ولا  
كلام أنا قاصد منه أفرض حاجة عليكي بمزاجي ، ده  
كله من كتاب ربنا وسنة حبيبنا النبي ﷺ الى خايف  
علينا ويريد لنا الخير والسعادة في الدنيا والآخرة ..



﴿١﴾ أنا عايز أكرم أختي اللي مكتوب في خانة الديانة  
في بطاقتها **"مُسَلِّمة"** ..

وأقولها يا أختي ياللى بتصلّي وبتصومي وبتطيعي  
ربنا.. بس .... **حجابك لسه مش كامل !!**

✓ **الحجاب** يا أختي مش مجرد طرحة بتتلف على  
الرأس و خلاص ... **الحجاب** يعنى لبس البنت  
المسلمة ككل ... كلمة "حجاب" أصلاً يعني بيحجب ..  
يعني بيمنع .. يعني بيغطي .. وده مش موجود في  
لبس البنات في الزمن ده زي ما إنتي شايفة !!!



❖ وأنا عايز أسألك في بداية كلامي :

**إنتي ليه أصلاً لابسة طرحة أو ايشارب أو خمار؟؟؟  
ليه مغطية شعرك؟؟؟؟؟**

◀ هل علشان طلعتي لقيتي والدتك كده؟؟ ولا علشان كلام الناس ؟؟؟؟؟؟؟ ولا علشان مش فاضية كل شوية تروحي للكوافير وتدفعي فلوس ؟؟؟؟؟؟؟ ولا علشان شعرك قصير أو مش حلو فبتغطيه وخلص ؟؟؟؟؟؟؟  
**ولا علشان ترضي ربنا ؟؟؟؟؟؟؟**

❖ **أنا واثق ومتأكد إنك محبة علشان ترضي ربنا**

طيب ما هو ربنا اللي أمرنا بإننا مانكشفش الشعر ، هو برده اللي أمرنا بإننا منلبسش ضيق ومنظهرش مفاتننا ومنخرجش بالزينة ميك أب وإكسسوار !!!!  
ولا إحنا بناخد من الدين اللي يمشي على مزاجنا؟؟!  
► أنا أمنية حياتي إن أوصل لكل بنت مفهوم الحجاب نفسي كل بنت مسلمة تعرف هي ليه محبة ؟؟؟؟؟؟؟  
☑ **لازم تفهمي يا أختي إن الغرض من الحجاب هو :**

**" ستر زينة المرأة "**

قال الله ﷻ : **(وَلَا يُدِينَ زِيَّتَهُنَّ )**



✓ **يعنى** وإنتي نازلة تشتري لبس ، تختاري اللبس  
 اللي يستر زينتك مش يزينك أكثر في عيون الشباب !  
**وإنتي** واقفة قدام المراية قبل ما تخرجي وبتتظطي  
 حجابك ، المفروض نيتك تكون هي إخفاء وستر  
الزينة، مش إنك تزيني نفسك أكثر في عيون الشباب!  
 ◀ يارب يا أختي تكوني فهمتي معنى الحجاب ..

◀ **وربنا** سبحانه وتعالى هو اللي فرض الحجاب ..  
 وهو أعلم بينا وبمصلحتنا وبالي فيه الخير لينا ..  
 فمش عايزين نقعد نقول ليه واشمعنى وعلشان إيه ؟!  
 ✓ إحنا نقول سَمِعنا وأطعنا يا حبيبنا يا الله ..

❖ **طيب أنا بكلمك لبيبييه ؟؟؟؟**

♥ أنا لما أشوف أختي ماشية وقدامها حفرة وهتقع  
 فيها وهى مش واخدة بالها ؛ لازم أحذرّها .. لازم  
 أخاف عليها وأنبّها وأعرفها هي رايحة على فين ؟!  
 بعد كده لو وقعت في الحفرة ، يبقى هي اللي إختارت  
 بأيديها .. وكل إنسان هو اللي بيتحمل عاقبة اختياره !



## رسالة إلى كل بنت مسلمة :

«رسالة لكل بنت طيبة ومؤدبة وبتصلي، وبتصوم، وبتقرأ قرآن ولكن للأسف فأكرة إن (لبسها محترم) !

### « بقولها يا أختي :

- ☐ مفيش حاجة اسمها لبس محترم ولبس مش محترم!
- ☐ مفيش حاجة اسمها بنطلون واسع وبنطلون ضيق !
- ☐ مفيش حاجة اسمها بنطلون وفوقه فيست مغطيه !
- ☐ مفيش حاجة اسمها بدي لوحده وبدي فوقه بلوزه !

☒ فيه حاجة اسمها ( الحجاب الشرعي الصحيح ) كما وصفه الله ﷻ ورسوله ﷺ .. وده اللي هنعرفه بإذن الله



♥ أنا هكلمك دلوقتي .. ولو حسيتي إني شديت عليك متزعلش؛ **لأني والله العظيم خايف عليكى ..**  
**وبحب ليكي الخير زي نفسي بالظبط ..** أنا ممكن أضحك عليكى بكلمتين زي أي حد مش خايف عليكى ومش خسران حاجة لما يجاملك ويقولك إنك كده كويسة وأحسن من غيرك ألف مرة !! اللي كاشفة شعرها، واللي لابسة نص كم واللي نسيت تلبس أصلاً!



► هتقولي : هو الموضوع خطر للدرجة دي يعني؟!

❖ هقولك : تعالى يا أختي نحسبها مع بعض :

- ➡ لو نزلتي الشارع و ١٠٠ واحد بس نظر ليكي ..
- ب ١٠٠ سيئة .. هنقول بسيطة .. مفيش مشكلة !
- ➡ لو نزلتي الجامعة وألف واحد بس من الألف اللي موجودين فى الجامعة نظر ليكي .. كل واحد هنقول نظر ١٠ نظرات هيطلع بس ١٠٠٠٠ سيئة !
- ➡ لو واقفة بقى مع شلة فى الجامعة ساعة ولا اتنين وكل واحد فيهم نظر ليكي ١٠٠ نظرة فى المدة دي ..
- ➡ لو شاب من إياهم اللي عينهم هيئة أرصاد جابك من فوق لتحت ربع ساعة يعنى كمان ١٠٠٠ نظرة ..
- ➡ لو نزلتي تتفسحي بالليل وكل واحد من شباب الليل اللي ميتوصوش ، هنقول نظر ليكي ١٠ مرات بس !

➡ أنا عايزك بقى تتخلي بعد كل ده ،

يا ترى هترجعي البيت بكام سيئة ؟؟؟؟!!!



◀ **ده كل ده ولا حاجة !!!** ده إنتي لسه قبل ما تنزلي  
وقفتي قدام المراية ساعة ولا اتنين تطبطي الطقم اللي  
هينطق عليك مع الأكسيسوريز الجامدة جداً وتحطي  
حبة مكياج خفيف على حبة روايح وبرفان وكله  
بحسابه !! ... وبعدين .. نزلتني الشارع .....

◀◀ بنت صغيرة في إعدادي شافتك قالت أنا هطلع  
زيك .. في ميزان سيئاتك !!

◀◀ شاب ملتزم شافك إنتكس .. في ميزان سيئاتك !!  
◀◀ شاب شافك شهوته ثارت راح إتجوز عرفى ..  
في ميزان سيئاتك !!

◀◀ واحد تانى لما شافك راح زنا، في ميزانك سيئاتك!  
◀◀ واحد تانى لما شافك نفسه إتفتحت قعد يبص على  
البنات طول الليل .. في ميزان سيئاتك !!

◀◀ واحدة ملتزمة لما شافتك إتفتنت بنظر الناس ليكي  
قلدتك في لبسك .. في ميزان سيئاتك !!

◀◀ بنتك لما تكبر وتشوف صورتك وتقول أنا هطلع  
زيك يا ماما .. في ميزان سيئاتك !!





## وعداد السيئات شغال إلا أن تتوبي !!

**تسابق المتبرجات في مجال الزينة المُحرّمة لأجل**  
لفت الأنظار إليهن ، مما يُتلفُ الأخلاق والأموال ،  
**ويجعل المرأة كالسلعة المهينة الحقيرة المعروضة**  
لكل من شاء أن ينظر إليها.



ومنها: **فساد أخلاق الرجال خاصة الشباب** ، خاصة المراهقين، ودفعهم إلى الفواحش المحرمة بأنواعها. ومنها: **تحتيم الروابط الأسرية** ، وانعدام الثقة بين أفرادها ، وتفشي الطلاق والخيانة الزوجية . ومنها: **المتاجرة بالمرأة كوسيلة دعاية أو ترفيه في مجالات التجارة** وغيرها .

ومنها: **الإساءة إلى المرأة نفسها** ، باعتبار التبرج قرينة تشير إلى سوء نيتها ، وخبث طويّتها ، مما يعرضها لأذية الأشرار والسفهاء .

ومنها: **انتشار الأمراض** ، كما قال ﷺ : " لم تظهر الفاحشة في قوم قطّ حتى يُعلنوا بها ، إلا فشا فيهم الطاعونُ والأوجاعُ التي لم تكن في أسلافهم " .

ومنها: **تسهيل معصية الزنا بالعين** ، كما قال ﷺ : "العينان زناهما النظر" ، وتعسير طاعة غض البصر التي أمرنا بها إرضاءً لله سبحانه وتعالى .

ومنها: **استحقاق نزول العقوبات العامة** التي هي قطعاً أخطر علينا من أي شيء آخر، قال ﷺ : "إن الناس إذا رأوا المنكر، فلم يُغيروه أوشك أن يعمهم الله بعذاب".



فيا أختي المسلمة : هلا تَدَبَّرْتِ قولَ رسولِ الله ﷺ :  
**" نَحِّ الْأَذَى عَنْ طَرِيقِ الْمُسْلِمِينَ " ؟؟؟**

- فإذا كانت إمطة الأذى عن الطريق من شُعب الإيمان التي أمر بها النبي ﷺ ، فأيُّهما أَشَدُّ أذى :  
 شوكةٌ أو حَجَرٌ في الطريق ، أم فتنة تُفْسِدُ القلوبَ ،  
 وتَعْصِفُ بالعقول، وتُشِيعُ الفاحشةَ في الذين آمنوا؟؟؟]

◀◀ وهنا هيطلع مُفكر وفيلسوف وهيقول :

**إنتو أصلاً أعداء المرأة ، إنتو كده بتتحاملوا على  
 البنات و بتبرروا للشباب المعاكسات والتحرش  
 والزنا والاعتصاب وغيره !!!**

❁ وأنا هرد وأقول : مستحيل يكون القصد هو تبرير  
أي شئ سواء معاكسة أو تحرش أو غيره .. اللي  
بيبرر تصرف زي ده مريض أكثر من اللي بيعمله !!  
 ولكن إحنا بنعرض مشكلة معينة وبنحاول ندور على  
 علاجها وبنتكلم بواقعية وبكلام ربنا وسنة حبيبنا النبي ﷺ  
 بعيد عن أي آراء أو أهواء شخصية ..

وموضوع التحرش هتناقشه في كتاب لوحده وهنوضح إن  
 السبب الأكبر والرئيسي هو أخلاق الشباب مش بس البنات!



## ❖ طيب حُكم الله ورسوله في اللبس ده إيه؟؟

« اللبس اللي إنتي مستهترة بيه وبتقولي ده حرية شخصية ومش حاطة أي أهمية ليه، النبي ﷺ قال عنه:

### ① من أهل النار ولن تقربي الجنة ولا تجدي ريحها !!

قال رسول الله ﷺ : « صنفان من أهل النار لم أرهما، قوم معهم سياط كأذناب البقر يضربون بها الناس، ونساء كاسيات عاريات، مائلات مُميلات، رؤوسهن كأسنة البخت المائلة، لا يدخلن الجنة ولا يجدن ريحها، وإن ريحها يوجد في مسيرة كذا وكذا »، رواه مسلم

**كاسيات عاريات :** يعنى لابسه وساتره نفسها ومفيش أي حاجة من جسمها ظاهرة .. بس لبسها ضيق مفصل جسمها كله ؛ فكأنها مش لابسة !! زي اللي بنشوفه دلوقتي بالظبط من لبس البنات (جيبات وبدييات وشيميزات وفيستات وبناطيل جينز و اسكني) !!!

**مائلات :** متبخترات في مشيتهن، مائلات عن طاعة الله

**مُميلات :** مُميلات لغيرهن .. مُميلات لقلوب الشباب!



**رؤوسهن كأسنمة البخت المائلة :** يعنى بتلف شعرها  
 كحكة فوق راسها أو تحط توكة كبيرة  
أو تلبس ١٠ طرح فوق بعض علشان  
 تنتفخ الحجاب ، وده بيبقى عامل زي  
 سنام الجمل زي ما النبي ﷺ أخبر ..



## ② ملعونة مطرودة من رحمة الله !!..

قال ﷺ : « سيكون في آخر أمتي رجال يركبون على  
 سروج كأشباه الرحال ، ينزلون على أبواب المساجد  
 نساؤهم كاسيات عاريات ، على رؤوسهن كأسنمة  
 البخت العجاف ، إلغوهن فإنهن ملعونات » حسنه الألباني

وقال ﷺ : « لعن الله النامصة والمتنمصة » متفق عليه  
**والنامصة :** هي التي تزيل أو تنتف أو ترقق من شعر  
 الحاجبين .. اللي بتعمل كده **ملعونة** !! وما أكثرهن !!!  
 -ترضي بكده ؟؟؟ ترضي تبقي ملعونة ؟؟؟!!  
**إنتي عارفة اللعنة يعني إيه ؟؟؟**

**«اللعنة=الطرد من رحمة الله!**



**ليه كده ؟ وإيه اللي يسناهل في الدنيا كلها ؟!**

« ده أي حد فينا يتمنى أقل جزء من رحمة ربنا !!  
هو إحنا أصلاً هندخل الجنة غير برحمة ربنا ؟؟؟؟؟  
كل ده علشان تبقى استايل وشيك والناس تقول واو !!!

### **③ زانية ولا يُقبل منها صلاة..!!**

قال رسول الله ﷺ : « أيُّما امرأة استعطرت، فمرّت  
بقوم ليجدوا ريحها فهي زانية » صححه الألباني  
وقال رسول الله ﷺ :

« لا يقبل الله من امرأة صلاة خرجت إلى المسجد  
وريحها تعصف حتى ترجع فتغتسل » حسنه الألباني

« زانية !! وكمان الصلاة مش مقبولة !!

**➡ ليه كده ؟؟؟؟؟!!!**

➡ ليه رضيتي يُطلق عليك " زانية " ؟ علشان إيه ؟!

**فيه { بنت عاقلة } في الدنيا نرضى بكده ؟!**

« معتقدش إن حد عنده ( ذرة عقل ) يرضى بكده !



#### ④ منافقة ومن شر هذه الامة...!!

قال رسول الله ﷺ : « خير نسائكم الولود الودود  
المواسية المواتية إذا إتقين الله .. وشر نسائكم  
المتبرجات المتخيلات ، وهنّ المنافقات ، لا يدخل  
الجنة منهن إلا مثل الغراب الأعصم » صححه الألباني  
وكمان منافقة !!! ومن شر الناس في أمة النبي ﷺ !!  
عارفة يعني إيه هتبقى منافقة ؟؟؟؟!! نفسي أعرف هل إنتي  
فعلاً متخيلة الكلام ده وحاسة بيه ؟؟؟؟!!!!

#### ⑤ من صاحبات الكبائر التي تعادل القتل...!!

« جاءت أميمة بنت رقيقة إلى رسول الله ﷺ تباعه  
على الإسلام ، فقال : أبايك على أن لا تشركي بالله  
شيئاً ، ولا تسرقي ، ولا تزني ، ولا تقتلي ولدك ،  
.... ، ولا تتبرجي تبرج الجاهلية الأولى » صححه الألباني  
« النبي ﷺ حط التبرج مع بقية الكبائر ، واشترط  
علشان يبائعها إنها لا تتبرج ، يعنى لو النبي ﷺ شافك  
دلوقتي مش هيرضى يبايك على الإسلام !!!  
**بالله عليكى ترضي بكده ؟؟؟؟!!**



➡ شوفتي الرسول ﷺ بيعظم خطورة التبرج

في لبس البنات قد إيه ؟؟؟؟؟؟؟!!!!

► هتقولي: إيه الكلام اللي إنت بتقوله ده ؟!

معقول ؟؟؟ إنت أكيد بتهرّج !! أنا عمري ما سمعت الكلام ده قبل كده !! للدرجة دي ؟؟؟؟!!!! للدرجة دي الموضوع خطير ؟؟؟!!!! للدرجة دي أنا ممكن ريحة الجنة حتى مشمهاش ؟؟؟!!!! للدرجة دي ممكن أبقى منافقة وزانية وملعونة !!! أنا بجد مصدومة !!!!!!!

◀ هقولك: أيوه يا أختي للدرجة دي الموضوع

**خطير..** التبرج جريمة بشعة ، ولكن من كتر تساهل الناس في الموضوع ده أصبح عادي جداً جداً !!



◀ أنا عايزك تتخلي نفسك يا أختي يوم القيامة ..

والشمس فوق الرؤوس بمقدار ميل .. والناس هتموت من الحر والعطش.. وفجأة تشوفي حبيبك النبي ﷺ واقف على الحوض وعارفك ومستنيكي وبيناديكي ،





تقومي تجري جري عليه علشان تقابلي حبيبك ﷺ  
وتشربي من الحوض الشريف ، ولكن للأسف تلاقى  
الملائكة بتمنعك من الوصول !! وتقول للنبي ﷺ : إنك  
لا تدري ما أحدثت بعدك !! أنت متعرفش يا رسول  
الله دي غيّرت كلامك وضربت به عرض الحائط !!!  
فيقول النبي ﷺ : سُحْقاً سُحْقاً !! بُعْداً بُعْداً !!

« ياترى شعورك وقنّها هيكون إيه ؟! »

ياترى ندمك إنك عصيتي أمر حبيبك النبي ﷺ  
هيبقى شكله إيه ؟؟!

قال رسول الله ﷺ : « إني فرطكم على الحوض ، من  
مرّ علي شرب ، ومن شرب لم يظماً أبداً ، ليردّن  
علي أقوام أعرفهم ويعرفونني ، ثم يُحال بيني وبينهم  
، فأقول : إنهم منّي ، فيقال : إنك لا تدري ما أحدثوا  
بعدك ؟ فأقول : سُحْقاً سُحْقاً لمن غيّر بعدي » متفق عليه

« أنتي عارفة ليه الرسول هيقول لناس منّا  
يوم القيامة يوم ما يقابلهم سُحْقاً سُحْقاً ؟؟؟! »



❦ هيقولهم :

بقي أنا ضحيت بحياتي علشانكم ، بذلت حياتي  
علشانكم ، والصحابة اتقطعوا حتت علشانكم.. وفي  
الآخر يطلع شبابنا كل همهم شهواتهم .. وتطلع  
بناتنا كل همهم لبسهم ومكياجهم وزينتهم !! يبقى  
كل همنا الشهوات !!! تبقى الشهوات هي مصدر  
فرحتنا و كل حياتنا !!

❦ يعني البنت تنزل تدور على لبس، لبس كاسيات  
عاريات معروض في كل مكان ، تقعد تلف على  
المحلات لحد ما تدووووخ ! وأول ما تلاقي لبس قذر  
متفصل على جسمها تفرح !!! مش عارفة إن  
فرحتها بالذنب أعظم عند الله من الذنب !!

**الأمة دلوقتي بقت بتفرح بالذنوب والعياذ بالله!!**

❧ معقول بعد كل تضحيات النبي ﷺ والصحابة  
في الآخر تبقى دي أحوالنا ؟؟؟؟؟!!!!





📢 مسنيه إيه بقى يا أختي؟؟

**مستنيه عقوبة ربنا في النار**

**علشان تفوقي بعد فوات الأوان؟؟!**

**إنتي عارفة يعني إيه النار؟؟؟!!**

➡ عمرك ما اتلسعني أو مسكتي أي شئ سخن ورميته بسرعه لأنك مش قادرة تستحملي !!

➡ عمرك ما جيتي تصبي الشاي مرة ونزل على إيدك شوية ميه سخنة وقعدتي تصرخي !!!

➡ وإنتي بتقلي مفيش مرة الزيت جه على إيدك وحرقتها وجريتني تشتري مراهم ومسكنات من الألم؟!

➡ ده الواحد لما بيشوف فرن مولع بيقول الواحد لو دخل هنا هيجصله إيه؟؟ **ما بالك بنار جهنم؟؟!**

➡ إيه اللي يستاهل إنك تودي نفسك جهنم؟!

**➡ لسه برده مش عايزة تفوقي؟؟!**



► هتقولي: إنت ليه بتتكلم بالأسلوب ده ؟؟  
 أسلوبك بجد صعب أووووووي ولازم تغيره !!!  
 إنت مش حاسس إنك بتتفر الناس منك بأسلوب  
 الخوف والترهيب القاسي والشديد أوي ده ؟؟!!  
 إنت مش بتتفرج على الدعاة الشباب اللي  
 عمرهم ما يتكلموا عن النار والعذاب وعلشان  
 كده الناس بتحبههم ؟؟!

❦ هقولك: والله العظيم مش بمزاجي .. أكيد نفسي  
 أتكلم عن حب ربنا والشوق للقاءه والجنة ونعيمها ..  
 ولكن في نفس الوقت لازم نتكلم عن الخوف من ربنا  
 والنار وعذابها .. ده دين ربنا .. خوف ورجاء ..  
 ترهيب وترغيب ..

مينفعش ناخد جانب واحد ونسيب الثاني علشان نعجب  
 الناس ومنبقاش "سوفاج" ومش "كيوت" خالص !!

◀◀ لازم نتكلم عن الخوف ولازم الإنسان يخاف  
 علشان يبطل معصية .. ده كلام ربنا مش كلامي !



{ فَذَكِّرْ بِالْقُرْآنِ مَنْ يَخَافُ وَعِيدِ } ق: ٤٥

«إِذَا يَ مِنْتَكَلَّمْشْ عَنِ النَّارِ وَرَبِّنَا بِيحْذَرْنَا وَيَخَوْفُنَا وَيَقُولُ:

{ لَّهُمْ مِّنْ فَوْقِهِمْ ظُلَلٌ مِّنَ النَّارِ وَمِن تَحْتِهِمْ ظُلَلٌ  
ذَلِكَ يُخَوِّفُ اللَّهَ بِهِ عِبَادَهُ يَا عِبَادِ فَاتَّقُونِ }

الزمر: ١٦

«ربنا بيوصف عذاب النار وصف دقيق علشان  
الخوف يدخل القلوب فتتحقق فيها التقوى وتبعد عن  
المعصية ..

ربنا بيحذر كل واحد ببيارزه ويتحداه بالمعاصي  
وبيقولك خااااف من جنهم اللي هيبقى فيها نار من  
فوقك ونار من تحتك !! هتصبر إزاي ؟!!!!



« كل الآيات دي وغيرها كثير بتدفعنا إن الواحد لازم يخاف من ربنا وعقابه .. لأن الإنسان لو عرف مدى إنتقام الله ﷻ ، ماكنش هيتجرأ على الله بالسهولة دي !

ولذلك قالوا:

**[ من أمن العقاب .. أساء العمل ]**



ما خاف الله إلا مؤمن ولا آمنه إلا منافق



◀ أنا عايزك يا أختي تلبسي حجاب صح بإرادتك وإنتي لسه في الدنيا ، لأنك كده كده هتتجبي غضب عنك حجاب كامل وإنتي داخله قبرك .. ٥ أو ٦ لفات كفن ملفوفة فيهم ومش ظاهر منك أي حاجة ! لا فيه بقى تطقيم ولا اكسسوارات ولا ميك أب ! شوفتي كفن قبل كده ؟ متخيلة شكلك وإنتي في الكفن؟!

• البسي حجاب صح بإرادتك بدل ما تلبسيه غضب عنك لو -لا قدر- الله جالك حرق أو مرض معين ؛ هتبقي عايزة أي لبس واسع تداري بيه جسمك ...!!!

❖ **إلبسيه حُب قبل ما تلبسيه غُصَب!**

◀ إنتي جرّبتِي تحبّي ربنا؟؟؟

ربك اللي أنعم عليكِ بنعم ملهاش حصر ولا عدد !

«مين وَهَبَك جسمك الحلو اللي بتلبسي عليه الجينز والبدي وبتمشي تفتني به الشباب !!؟»

«مين وَهَبَك لسانك اللي بتكلمي بيه الشباب ليل نهار؟»



«مين وَهَبَكَ الوجه الجميل اللي بتزَيِّنيه بالمكياج  
وتعملي حواجبك وتخرجي تفتخري بجمالكَ !!؟؟»

«مين وَهَبَكَ ودانك اللي ملياها معاصي وأغاني !!؟؟»

**بصي لنفسك وشوية نعم ربنا هتلاقى مغرقاكي !!**

ومع ذلك بدل ما تشكري ربنا عماله تعصيه بنعمه !!

بدل ما تحبِّيه وتقربِّي منه أكثر بتبعدي عنه أكثر !!!

♥ وبالرغم من كده بيرزقك ويسترك ويحفظك وينعم  
عليك أكثر وأكثر .. بالرغم من معصيتك وجراأتك  
عليه فاتحك باب التوبة وبيفرح بتوبتك ورجوعك ..

**➡ مش مكسوفة منه ؟؟؟!**



❧ أنا عايز أسألك: إنتي بتحبيه؟؟ بتحبِّي ربك بجد؟؟

♥ إحنا فيه ناس في حياتنا بنحبهم بجد ومش بنقدر  
نتخيل حياتنا من غيرهم ، وعلشانهم بنضحي وبنعمل  
أى حاجة فى سبيل اسعادهم ، وأحيانا بنغير صفات  
جوانا وبنسهر كثير ونفكر إزاي ننال رضاهم وحبهم!





♥ وأوقات بنحب حاجات مكناش بنحبها علشان هما بيحبوها ! أوقات بنغير حياتنا كلها علشانهم !!!

♥ كل ده لأننا بنحبهم بجد .. الحب الحقيقي بيقاب  
كيان الإنسان ويخليه يعمل أي شئ علشان حبيبه !!

فيه شاب علشان حب بنت فقد كليته! وفيه بنت سابت الدنيا كلها علشان شاب! ياترى إنتي علشان حب ربنا مستعدة تعملي إيه؟؟ مستعدة تضحي بإيه??!!

◀◀ لو بتحبي ربنا بجد مش هتستكتري أبداً تضحي بشوية قماش و حبة برفان ومكياج علشان حبيبك!!!!!!  
لو بتحبي ربنا بجد مش هتقعدي تجادلي ده فرض ولا سُنّة؟؟ مش هتقعدي تسألني هو اللبس ده ينفع ولا لا ؟  
♥ ده إنتي هتدوري على أكثر لبس يرضي حبيبك وهتنزلي تشتريه وإنتي في قمة الفرحه والسعادة !!  
لأن القلب لما بيدوب من الحب ، بيتمنى بس حبيبه يرضى وساعتها بتكون الدنيا مش سايعاه من الفرحه!!

الخوف يا أختي هيخليكي تسببي حاجات .. إنما الحب  
هيخليكي تعملي حاجات ماتتخليش إنك ممكن تعملها!

♥ عداد حسنات مفتوح ♥

مليارات السيئات اللي إحنا حسبناها وإنتي متبرجة  
هتخديها حسنات .. ويا فرحتك بقربك من الله ..

♥ يا فرحتك برضا ربنا عنك ..

♥ يا فرحتك لو التزمتي بحجابك وحسنتي أخلاقك ..  
♥ يا فرحتك عند الموت والملائكة بتبشرك بالريحان ..  
♥ يا فرحتك يوم القيامة وإنني بتشربي من حوض النبي  
♥ يا فرحتك وإنني داخلة الجنة مع أمهات المؤمنين ..  
♥ يا فرحتك بجمالك ودلالك ونعيمك في الجنة ..  
♥ يا فرحتك وإنني بتمتعي بالنظر لوجه الله الكريم ..  
ربنا يفرح قلبك ويسعدك يارب في الدنيا والآخرة ..





## معاني الأنوثة



الأنوثة نعمة غالية ... ربنا اللي إداها ليكي  
وبأيديكي تحفظيها ، أو تضيع من بين أيديكي  
إحمدي ربك تملّي ... واشكري نعمه عليكي  
إوعي تفتخري بجمالك ، كله زایل من عنيك



الأنوثة مش بإنك ... تهوسي عقل الشباب  
الأنوثة هي إنك ... تحمي نفسك م العذاب  
الأنوثة شئ وكامن ... جوّه منك وانت باب  
إوعي تتمايعي بكلامك ، أو تقولي دول صحاب  
تبقي تستهلي اللي يحصل والسؤال ملهوش جواب!



الأنوثة مش مجرد .. حبة أحمر ع الشفايف  
الأنوثة مش في إنك .. تهوسي عقل اللي شايف  
إبعدي عن كل شبهة ، دول بناتنا كتير عفايف



الزهور بتكون جميلة ، طول ما لسه الشوك حاميتها  
بس لو يوم شوكها سابها ؛ ألف إيد تتمد ليها !!!!!  
خلي نورك جوه قلبك .... والإيمان هيكون ماليا



إقري في القرآن وسيبك .. م الأغاني مع الصحاب  
إعري سنة رسولك .. صححي صورة الحجاب  
إوعي تلتفتي لكلامهم ، مش ده أرحم م العذاب ؟؟  
لو تقيسي الدنيا ديّه ، إيه هتاخدي غير تراب ؟!



إنسي مكياجك وسيبي .. نور إيمانك يملئ وشك  
بدلي مرايتك بقلبك .. مستحيل قلبك يغشاك  
خلي مكياجك إيمانك ، مش بأحمر ع الخدود  
طهري دايماً في قلبك ، بكرة نصبح أكل دوود  
مش تعدي أي كلمة ... قفلي كل السدود



عطري روحك بذكرك، وإرضي ربك وإمشي راضية  
لو في مرة حد عاكسك .. مش تردي بكلمة فاضية  
إوعي تدي فرصة ليهم ، وإدى ليهم ضربة قاضية



هو أحسن ترضي ربك؟ ولا ترضي الناس بحالها؟  
 هو إيه للبنت يشفع ؟؟؟؟ شكلها ولا عملها ؟؟؟؟  
 دا الجمال في الجسم زایل، إنتي شوفتيه دَام لمين؟  
 والجمال في الروح بيفضل .. مهما بتعدي السنين  
 كوني بنت بألف راجل .. إخرسي في الطمّاعين



سيرة البنت العفيفة .. هي أحسن شئ يدوم  
 حبرها مكتوب بدينها ؛ مش بمكياج أو هدوم  
 إوعي صوتك يعلى مرة ؛ ده الرسول علّم علوم  
 إنتي بإيديكي تكوني .. زي نور وسط الغيوم



كل شئ في الدنيا لَمَّا .. بيداروه بيزيد جمال  
 والعضاف للبنت يغلب .. أي شكل و أي مال  
 إنتي أجمل ألف مرة .. لو جمالك جوه قلبك  
 مش مهم الخلق ترضى .. المهم هترضي ربك  
 هو إيه في الكون دا يغلب لو إله الكون دا حبك ؟  
 هو إيه في الكون دا يغلب لو إله الكون دا حبك ؟



إهداء الشاعر / أحمد عبد الله

«ندخل على أهم نقطة في موضوع الحجاب، وهي:

# صفات الحجاب الشرعي الصحيح

لبس المرأة ممكن نقسمه ببساطة إلى حجاب وجلباب..

♥ الحجاب : بمفهوما هو الحاجة اللي بتغطي الرأس

♥ والجلباب : يعني اللبس اللي بيبقى تحت الحجاب أو اللي هو العباية بمفهوما ..

لازم نظبط الاتنين .. يعني مينفعش أبقي لابسه حجاب صح وجلباب مخالف أو العكس !!

♥ أولاً : الحجاب : حجاب فضفاض.. سواء إيشارب كبير أو طرحة كبيرة أو خمار ..أهم شئ يكون :

✓ **الحجم:** لا اااازم يغطى منطقة الصدر كلها.. كلها !

✓ **الشكل:** مش مثقوب ولا شفاف ولا مطرّز ..

✓ **اللون :** ألوان مش مُلفتة أوي ومبهرجة !

**✕ وطبعاً بلاش بقى لفات الحجاب التركى والهندي  
والاسبانىش والانجليش .. كفاية لعب بالحجاب !!!!**



♥ **ثانياً : العباية :** عارفه إسدال الصلاة اللي بتلبسيه زيه كده بالظبط ؛ أصلك واقفه بين إيدين ربنا في الصلاة .. وف نفس الوقت إنتي برده بين إيديه في الشارع وفي كل مكان .. يعني ممكن عباية أو ملحفة أو إسدال .. أو ممكن أي حاجة تانية .. مفيش لبس بالاسم مفروض عليكى .. البسي أي حاجة تناسبك ..

## « بس أهم الشروط لأي حاجة تلبسيها :

- ✓ انها متعرفش اللي يشوفك حجم جسمك ..
- وده أهم شرط ، يعني متعرفش حد إنك تخينة ولا رفيعة .. يعني مفيش حاجة نهائياً اسمها (وسط) أو (تجسيم) للعباية أو أي لبس هتلبسيه !!!
- وبالتالي طبعاً مينفعش لبس البنطلون إطلاااااقاً ..
- ✓ وتكون طويلة ومغطية قدمك بحيث إنك لو قعدتي أو ركبتى مواصلات مفيش حاجة من جسمك تنكشف.
- ✓ وقماشتها طبعاً تكون سميكة مش شفافة ..
- ✓ والألوان ..؟؟؟؟؟؟؟؟ البسي أي لون يعجبك ، بس ياريت تبعدى عن الألوان المُلَفَتَة أوي اللي تخطف عين اللي يبصاك ..



﴿وأرجع وأقول زي ما قولتلك في بداية الكتاب ، أنا عايزك تفهمي إن غرض الحجاب هو "ستر الزينة" وعشان كده فيه شرط مهم جداً مع كل اللي فات وهو:

✓ **أن لا يكون الحجاب زينة في نفسه**

لو فهمتي الشرط ده مش هتلبسي إلا اللبس الصح ..



✗ **مُفسدات الحجاب :**

✗ البرفان والروايع بأنواعها ..

✗ المكياج بكل أنواعه ..



► **هتقولي :** والي عايزة تلبس نقاب ...؟؟؟

﴿هنقولها : يبقى نقاب مع أي حجاب وجلباب بنفس

المواصفات اللي ذكرناها .. النقاب الحقيقي بجد ..

اللي فيه تقوى لله عز وجل .. من غير عبايات ضيقة ولا

كحل ولا أي لاينر ولا نمص ورسم حواجب !

✓ **النقاب اللي يزيدك حياء وعفة وبُعد عن الاختلاط**

**المُحرّم .. النقاب اللي يقربك من ربك ويخليكي**

**تحسنّي أخلاقك ومعاملاتك مع الناس كلها ..**





❦ الفقهاء اختلفوا هل النقاب فرض ولا مش فرض ؟  
 إحنا مش هنقعد نجيب أدلة ونتجادل .. إحنا هنقول إنه  
يكفي إن النقاب لبس زوجات النبي ﷺ أمهات  
المؤمنين ، ولبس الصحابيات الطاهرات ، ولو لبستيه  
 هتبقى بتتشبهي بهنّ ، ومن تشبه بقوم فهو منهم ..



♥ **بنت هتقول :** طيب أنا دلوقتي كنت بلبس بناطيل  
 وبديهاات ومكنتش أعرف الكلام ده كله .. هل لو تبت  
 ورجعت لربنا وغيّرت لبسي ، ممكن ربنا يقبلني  
 ويغفرلي ؟؟؟؟ مُمْكِن ؟؟؟؟؟؟؟؟؟؟؟؟؟؟؟؟؟!!

❦ **هقولك :** ☒ طبعاً يا أختي هيقبلك ويغفرلك ..

ربنا ﷻ يقول : { وَهُوَ الَّذِي يَقْبَلُ التَّوْبَةَ عَنْ عِبَادِهِ  
 وَيَعْفُو عَنِ السَّيِّئَاتِ } الشورى: ٢٥

☒ **ومش كده وبس ؛ ده كمان ربنا هيفرح بتوبتك ..**

قال رسول الله ﷺ : [ واللّه ، لله أفرح بتوبة عبده من  
 أحكم يجد ضالته بالفلاة (الصحراء) ] صححه الألباني

☒ **ومش كده وبس ؛ ده ربك حبيبك كمان هيبذل كل  
 سيئاتك حسنات بفضلته وكرمه ورحمته ..**



## الموضوع مش محتاج تفكير .. خدي القرار حالاً .. ده مصيرك .. يا جنة يا نار ؟!

♥ طيب ده بابا وماما مش موافقين ..؟؟؟؟!

يا أختي دي شطارتك بقى ... زي لما بتبقي عايزة فلوس أو حاجة معينة وبتعملي كل الطرق علشان يجيبوها لك .. تقدري تقنعيهم بإذن الله بالحجاب الصح ..

♥ هيقولولي إنتي كده بتضيعي شبابك .. إنتي كده بتدفعي نفسك .. عيشي حياتك واتمتعي وبلاش تعقيد وتشدد ، وربنا رب قلوب ، وكلام كتير زي كده !!!!!

خدي بالك .. لو صخرة متينة وعمالين نحدفها بالطوب مش هياثر فيها .. إوعي تسمعي لأي كلمة من أي حد! إنتي اللي على الحق .. ولازم تثبتي .. الناس اللي بتقولك كده مش هيدخلوا معاك قبرك ولا هيتحاسبوا بدالك ولا هيرضوا يدولك حسنة واحدة يوم القيامة!!  
☛ دول شياطين إنس ، إوعي تسمعي لكلامهم !



♥ طيب ده زمايلي وأصحابي كلهم هيسيبيوني ..؟؟!

زمايلك وأصحابك ولا ربنا ..؟؟! .. مفيش وجه إختيار  
أصلاً يا أختي !! إختاري ربك ومستحيل هيضيعك ..

♥ طيب ده أنا كده هغنس ومش هتجوز ..؟؟!

مين قال كده؟؟؟؟! زوجك اللي مكتوبلك قبل ما تلبسي  
الحجاب الصح متغيرش ، هو هو نفس زوجك اللي  
مكتوبلك بعد ما لبستيه ومحدث هياخده ، وهيجيلك  
هيجيلك لحد عندك وقت ما ربنا يريد ..

♥ طيب ده الناس هتتريق عليا وعلى لبسي ..؟؟!

الناس هتقولك ده اللبس الواسع ده بتاع الستات  
العواجيز والفلاحين .. بتاع (تيتيه) و (جدتو) ويتريقوا  
عليكي..! لازم تستحملي .. وتعرفي إن هيجي اليوم  
الى هتتريقى إنتى عليهم وإنتى فى نعيم الجنة ..

♥ طيب أنا هغير حجابي بس لما ربنا يهديني ..؟؟!

طيب إنتي لما بتبقي مريضة مش بتاخدي دوا ؟؟؟؟؟  
لما بتجوعي مش بتاكلي ؟؟؟ لكل شئ سبب ، يعني  
اللي عايزة ربنا يهديها لازم تاخذ خطوات للهداية دي.



♥ بس أنا بحب الموضة مووت ! والحجاب الصح  
 هيخلي شكل مش حلو و **old fashioned** وأنا  
 بصراحة بحب أكون استايل في لبسي و شكلي !!  
 طيب عايزين نتفق الأول إن مفيش بنت مابتحبش  
الموضة واللبس ؛ ربنا خلق المرأة على فطرة حب  
 الزينة وحب إنها تكون جميلة وجذابة ..

❖ **بس هل معنى كده إن أنا أمشي ورا شهواتي؟؟**

ⓧ لا طبعاً .. ده إحنا فى الدنيا هنا فى إمتحان ..  
 إمتحان هل هنتبع شهواتنا ونسمع كلام الشيطان ولا  
 هنطيع ربنا ونصبر شوية فى الدنيا علشان الجنة؟؟  
 ◀ قال الله تعالى : { **الَّذِي خَلَقَ الْمَوْتَ وَالْحَيَاةَ**  
**لِيَبْلُوَكُمْ أَيُّكُمْ أَحْسَنُ عَمَلًا** } [ الملك: ٢ ]

♥ بس أنا اتعاملت كتير مع محجبات ومنتقبات  
 أخلاقهم سيئة جداً وكتير منهم غاوية " منظره " !!  
 هقولك كل حاجة فيها الكويس والوحش ، وأنا عايزك  
تلبسى الحجاب الصح وتكونى قدوة ونموذج فى  
 الأخلاق، وتقولى لكل تعالوا شوفوا أخلاق المحجبات.



♥ بس أنا خايفة اكون قدوة سيئة ، خايفة مثبتش !  
 أنا عارفة نفسى بتأثر يومين وأرجع تانى !! أنا  
 أصلى بتأثر بصحابى.. يعنى ممكن أظبط الحجاب بس  
 اللبس هيحلو فى عيني تانى وهرجع زى ما أنا؟؟!

طيب وإنتي عرفتى منين إنك هترجعي تانى ؟؟؟؟؟!!  
 ياترى بتعلمي الغيب ؟؟؟؟ وبعدين فين ثقتك في ربنا  
 وتوكلك عليه ؟ ليه سوء الظن بالله ؟ كام واحدة ثبتت؟  
 كتير بفضل الله .. ليه متقوليش إن ربنا هيثبتك وتدعى  
 بالثبات !! إنتي عليكى التوبة والبداية وهو سبحانه  
 وتعالى عليه هيهديكي ويثبتك .. قال الله تعالى :

( وَالَّذِينَ جَاهَدُوا فِينَا لَنَهْدِيَنَّهُمْ سُبُلَنَا وَإِنَّ اللَّهَ  
 لَمَعَ الْمُحْسِنِينَ ) سورة العنكبوت: ٦٩

- وإوعى الشيطان يقولك إستني شوية على ما تبطل  
 كل الذنوب وبعدين تغيري الحجاب علشان تكوني قدّه!  
ده كله من تلبس إبليس !! لأنك حتى لو قعدتي  
 عمرك كله علشان تبقي خالية من الذنوب ، مستحيل  
 يحصل !! لسبب بسيط أوي .. لأنك بشر مش ملاك!  
 وكل ابن آدم خطاء ، وخير الخطائين التوابون ..



♥ هتقولي هلبسه بس لما أقتنع بيه الأول !!

هقولك الموضوع مش بالإقتناع أبداً ، قال الله تعالى :  
( وَمَا كَانَ لِمُؤْمِنٍ وَلَا مُؤْمِنَةٍ إِذَا قَضَى اللَّهُ وَرَسُولُهُ  
أَمْرًا أَنْ يَكُونَ لَهُمُ الْخِيَرَةُ مِنْ أَمْرِهِمْ وَمَنْ يَعْصِ  
اللَّهَ وَرَسُولَهُ فَقَدْ ضَلَّ ضَلَالًا مُبِينًا ) الأحزاب: ٣٦

♥ وياريت لو تقراي كتب "نيو فاشون" و"إنتي  
غيرهم" و"فكيها شوية ١ و ٢" و"أحلى حاجة فيكي"  
هتلاقي فيهم الرد على أي شبهة الشيطان هيجيبها لك..

**مفيش وقت للتسويف ..إوعي تستني !!..**

◀ **خدي القرار فوراً،** محدش عارف هيموت إمتى؟  
وموت الفجأة شايفين قد إيه انتشر في الزمن ده !!!

**لو قابلتي رينا وإنّي لسه باللبس ده ..  
هتقوليله إيبيبه ؟؟؟؟**

- ◀ هتقوليله كنت مستنيه لما أخطب الأول !!؟؟
- ◀ ولا هتقوليله الناس كانت هتقول عليا مش شييك؟
- ◀ ولا هتقوليله ما كل البنات كانت بتلبس كده !!؟؟
- ➡ مش عايزين نندم في يوم مش هينفع فيه الندم!!



✓ مش عايزين حد يقول هلبس الأول بنطلون واسع  
وبعدين جيبه وبعدين ممكن أبقى ألبس خمار !!

## عايزين حجاب صح كامل مرة واحدة !!

◀ بس فيه ناس بتقول : أنا لو غيرت لبسي مرة  
واحدة هيبقى صعب ومش هقدر !!!

► هقولك : لو تضمني إنك تعيشي يوم واحد كمان  
خدي خطوات براحتك! إنما محدش فينا ضامن عمره!

◀ لو جالك ملك الموت هتقوليله إيه؟؟

إسئني شوية على ما أثوب واغير لبسي؟؟!

احمدي ربك إنه أمهلك لحد دلوقتي ورزقك العمر  
والفرصة علشان تلحقي تتوبي وتصححي حجابك ..

✓ عايزين نفوق بقي ونعمل حساب آخرتنا

ووقفنا للحساب أمام الله سبحانه وتعالى!..

◀ ده إنتي لو خطيبك أو زوجك قالك إلبسي إسدال أو  
حتى نقاب، هتلبسيه فوراً عشان بتجبيه ومش بتزعليه !

فهل رضا خطيبك عندك أفضل من رضا ربك ؟؟؟؟!



❗ **لسه برده مترددة ؟؟؟؟**

➤ **خُليكي حاسمة .. وخدي القرار فوراً ..**

☑ عايزين نلبس الحجاب اللي يستر بجد ، الحجاب  
اللي يرضي ربنا حبيبنا ، ويكون سبب في قربنا منه ..  
**مش عايزين إستعباد لشهواتنا أكثر من كده!!**  
➤ وخلي الكلمتين دول على طول فى بالك ..

**من وجد الله فماذا فقد ؟؟**

**ومن فقد الله فماذا وجد ؟؟؟؟**

♥ ياللا يا أختي نصح حجابنا ونصلّي فروضنا ..  
ونرجع لقرآننا ونغيّر حياتنا و نبدأ حياة جديدة ..  
حياة هدفنا الوحيد فيها هو رضا ربنا اللي خلقنا وأنعم  
علينا بنعم ملهاش عدد ولا حصر ..  
حياة كلها راحة وطمأنينة وسعادة .. شعارنا فيها ..

**مع أحلى حياة في طاعة الله ﷻ**

✂ [www.goodwayinlife.com](http://www.goodwayinlife.com) ✂





فسماتہ .. ونصیب

**أم محمد :** عقبال عندك يا أم فاروق .. إبتسام بنتي  
جالها عريس إنما إيه ، ميتحكيش عليه .. والخطوبة  
بإذن الله يوم الخميس الجاي ..

**أم محمد :** الله يباركلك.. عقبال بناتك كده إن شاء الله

**يعني إنتي يا أم محمد بتغيظيني يعني علشان جوزتي  
بناتك وأنا بناتي لسه قاعدين ! مااااااااااااشى !!!!**

(الست أم فاروق عندها خمس بنات ما شاء الله )

رانيا ٣٠ سنة كلية طب ... رضوى ٢٨ سنة كلية تربية

روعة ٢٤ سنة كلية آداب ... راجية ٢٢ سنة كلية تجارة

## رحمة ٢٠ سنة كلية صيدلة !



«نادت الست أم فاروق على بناتها .. وإجتمع البنات بعد ما كانوا سمعوا الحوار بين أمهم وأم محمد وهما عارفين الكلمتين اللي هيسمعوهم !

«أم فاروق : بصوا بقى يا بنات .. أنا جالي الضغط والسكر والقلب منكم .. وخلاص مرارتي هتفرقع .. ده إن ماكنتش فرقت أصلاً !!! بنات المنطقة كلهم إتجوزوا وإنتو لسه قاعدين .. أعمل إيه بس يا ربي؟؟!

« **قالولى ذوقى البنات :** جبتلخوا أغلى ميك أب ..

وأحسن لبس .. ودولاب كل واحدة فيكوا يشهد .. وإنتو أصلاً قمرات من غير حاجة، وبرده مفيش فايده!

« **قالولى ورّى الناس بضاعتك :** سيبتكوا تخرجوا

وتروحوا الأفراح والحفلات .. وبرده مفيش فايده !

« **قالولى مكاتب الجواز :** قدمناكم فى ١٠٠٠ مكتب

ومكتب وبرده مفيش فايده !

« **قالولى يبقى التليفزيون هو الحل :** إتصلنا ببرنامج

(بدل العريس ألف) فى قناة (عريسك عندنا وبس)

وبرده مفيش فايده !

« **قالولى يبقى مفيش غير انت :** جيبنا خط نت ..

وإشترطنا فى كل مواقع الجواز .. وبرده مفيش فايده !



## ❖ قولولي أعمل إيه بس يا ناس؟؟!!

ياللا إنتي وهيا إمشوا من قدامي .. وكل واحدة تنزل  
دلوقتي ومترجعش البيت إلا بعريس فى أيديها وإلا  
مش هتدخل البيت !! فاهمين ولا لأ ؟؟؟!!!!!!  
صبرني يارب! .. صبرني يارب! .. صبرني يارب!



◀ نسيب الست أم فاروق على ما تهدى شوية ..  
وتعالوا بينا نتكلم في ظاهرة أو مشكلة مجتمعية ..  
وأكيد طبعاً عرفتوا هتكلم معاكم فى إيه ..

## مشكلة العنوسة...!!

أو مشكلة البنات اللي إتأخر زواجهن شوية ...

❖ وفي الجزء ده ، هحاول نتناول الموضوع بشكل  
مختصر جداً وبسيط .. وإن شاء الله اللي عايز يقرأ  
عن الموضوع بالتفصيل يرجع لكتابي " حلم جميل "  
اللي بيناقش الموضوع ده ..



« الزواج يا بنات سنّة ربنا فى الأرض .. يعني مش عيب  
أبدأ ولا حرام إني أتمنى الزوج الصالح .. بالعكس ؛  
ده من وصايا حبيبنا النبي ﷺ : **« تزوجوا فإني مُكاثِر  
بكم الأمم ، ولا تكونوا كرهبانية النصارى »** صحّحه الالباني

« ومشكلة العنوسة موجودة من زمان ؛ بس مش كانت  
أصبحت ظاهرة بشكل واضح لأسباب كثير جداً مش  
موضوعنا إنا نتكلم فيها .. والإحصائيات الأخيرة بتوضح  
مدى سوء المشكلة يوم بعد يوم !!»

► **المشكلة الكبرى** اللي بتقابل أي بنت في موضوع تأخر  
الزواج هى مشكلة الضغوط من عدة إتجاهات .. أهمها :

- ① **ضغوط من البنت نفسها ..**
- ② **ضغوط من الأهل ..**
- ③ **ضغوط من الناس ..**

### **أولاً : ضغوط من نفس البنت:**

« وده غصب عنها مش بمزاجها .. زي ما قولنا إن  
الزواج سنّة ربنا فى الأرض ، وربنا ﷻ خلق المرأة  
ضعيفة وميالة للعاطفة، محتاجة زوج يكون جنبها يعطف  
عليها ويحسسها بالحنان والأمان ، ده غير فطرة الأمومة  
اللي ربنا أوجدها فيها ؛ فالبنت جواها زيها زي أي بنت ،  
نفسها تتجوز وتبقى ربّة بيت وتبقى أم وتعيش الحب الحلال

[illegible]



يكون مش عارف إيه؟؟ وفلانة خطيبها سابها ! وفلانة عريسها عمل مش عارف إيه؟؟؟ وفلانة وفلانة .. الخ .. وكلام الناس بيجرح ومش بيخلص !

➡ **الضغوط دي كلها مع الشيطان مع النفس الأمانة بالسوء** ، أوقات كتير بتكون شديدة أووووووووي و للأسف بيدفعوا البنت إنها توصل لدرجة إنها عايزة تعمل أي حاجة مقابل إنها تتجوز .. أو تشيل الضغوط دي عنها بأي طريقة ، حتى ولو كانت الإنتحار!!!!

◀ يعني بعض البنات زي ما بنشوف وبنسمع كتير.. تكون ملتزمة وصاينة نفسها ومش عايزة تغضب ربنا ومع ذلك برده مجالهاش عريس لحد دلوقتي ؛ مع إن زميلاتها اللي مش ملتزمين خالص .. أو على الأقل لبسهم مش صح بيجيلهم عريس واثنين وعشرة ، وهي مفيش حد عبّرها ولا فكر يدق الباب..!

✕ **فيبدأ الشيطان يشكك البنت في نفسها !**

📢 **هو أنا صبح ولا غلط...؟؟؟**

**طيب لو صبح ، أمان ليك أنا كده وهما كده؟؟**



➤ ويبدأ الشيطان يشوف شغله ويخليها تتنازل واحدة واحدة .. مثلاً من نقاب لخمارة .. ومن خمارة لطرحة قصيرة .. وبعدين جيبة وبلوزه .. وبعدين بنطلون وشوية ميك أب خفيف ... وهكذا ... وكل شوية طقم جديد وإكسسوار وميك أب بقدر كده ..

### وبعد كل ده ، برده مفيش عريس . . . . .!!!!

➤ تبدأ تخرج وتلف وتروح هنا وهناك على أمل إن حد يشوفها ويتقدم لها .. وبرده مفيش فايده !!

➤ تبدأ ترخص نفسها لو كانت في كلية مثلاً أو في شغل وتروح هي اللي تكلم الولاد وتتصاحب عليهم وده طبعاً بنشوفه كتيييبيير .. وبرده مفيش فايده !!

➤ تدخل النت .. وتكلم ده وتعمل شات مع ده وده .. وتدي ده رقم موبايلها .. وبرده مفيش فايده !!

➤ ولو البنت ماكنتش جميلة مثلاً أو مش واثقة في نفسها ممكن تتنازل وتعمل أكثر من كده عياداً بالله وإنتمو شايفين أكثر مني اللي بيحصل !!!

### طيب ليه كده برده مفيش جواز ؟؟!

◀ أصل المشكلة إن البنت مش عارفة إن كل اللي بتعمله ده اسمه أخذ بالأسباب .. حتى ولو كانت الأسباب دي غلط!



❦ هي فاكدة إن الأسباب دي ؛ زي الجمال واللبس والخروجات والشات هي اللي هتجيب العريس .. ونسيت البنت إن رب الأسباب سبحانه وتعالى هو اللي لازم يأذن علشان الأسباب تشتغل .. ومن غير ده .. يبقى حتى لو أخذت بأسباب الأرض كلها مش هيغلها عريس برده..!

## 📢 طيب إيسيسيه الحل ؟؟؟؟

- قبل ما نتكلم فى الحل، لازم ألفت النظر لعدة نقط :

⊕ أولاً : أي شاب محترم وملتزم بجد لما بييجي يدور على زوجة ، مستحيل هيختار واحدة من على الشات أو من مكالمة موبايل ! وصعب إنه يفكر في يوم في واحدة لبسها مش زي ما ربنا ورسوله ﷺ أمر حتى لو كانت حتى أجمل واحدة فى الكون ! لأن أهم حاجة عنده الدين والأخلاق زي ما النبي ﷺ وصّاه ..

♥ الدين و الحياء و الحجاب الصح هما اللي هيخلوكي أجمل واحدة في نظر أي شاب محترم ..

❦ بنت هترد وتقول : طيب ده رأيك و كلامك إنت ..!  
إنما اللي بنشوفه على أرض الواقع دلوقتي إن أغلب الناس بقت تختار بمقياس الجمال واللبس والشياكة !





وأكبر دليل إن أصحابي اللي مش ملتزمين ومقضييها  
إتجوزا وخلفوا ، وأنا الحمد لله بطيع ربنا في لبسي وفي كل  
حياتي .. ومع ذلك لسه متجوزتش !

❖ **هقولك :** حتى يا أختي لو فرضنا إن كلامك صح وإن  
الناس كلها بقت تختار بناءً على الجمال واللبس والشياكة  
، هسألك يا أختي شوية أسئلة وعمايزك تشغلي عقلك  
وتفكري فيها كويس جداً ..

❖ **تفتكري** الشاب اللي إختار بنت علشان جمالها .. لو  
حصلها أي حاجة ، مثلاً طلعها شوية حبوب فى وشها أو  
لا قدر الله حصلها حرق أو جالها أي مرض شديد ..  
تفتكري هيطيق يعيش معاها بعد كده !!؟؟؟؟؟؟؟؟؟؟

❖ **تفتكري** اللي إختار بنت علشان عجبته وهي متمكيجة  
فى فرح أو حفلة ، مش هيبص لغيرها .. ده بص لألف  
واحدة قبلها زي ما بصلها .. ولا تفتكرى ده واحد ملتزم  
ومتدين علشان يختار بالشكل ده !!؟؟؟؟؟؟؟؟؟؟

❖ **تفتكري** إن العريس اللي إختار الجمال .. وسمح  
لعروسته إنها تقلع الحجاب فى ليلة الفرح وخلاها ترقص  
قدام الناس .. تفتكري ده راجل أصلاً عنده نخوة هيحافظ  
على زوجته ويصونها ويخاف عليها بجد !!؟؟؟؟

❖ **يا ترى عايزة تتجوزي عريس من دول ؟؟!**



◀ **تفتكري** إن البنت اللي راحلها شاب عنده عربية وعماره وفلوس ولكنه مش بيصلي ، ووافقت عليه ! تفتكري ده هيعاملها بما يرضي الله ، وهيتقي الله فيها وهتكون عيشتهم سعيدة ؟؟؟؟

◀ **آه بنات كثير بيتجوزوا... بس إيه اللي يحصل بعد الجواز !!؟؟**

مصايب وبلاوي.. وعيشة سيئة جداً.. وده اللي بنشوفه وبنسمعه.. وما خفي خلف أبواب البيوت كان أعظم !!

➡ **كام حالة طلاق فى المحاكم وكام مشكلة ! ليه ؟؟**

◀ لأن البيت اتبنى غلط من الأول ! و أثار المعصية بدأت تظهر! الناس فرحت علشان البنت إتجوزت !!! سنة أو سنتين أو كام شهر حتى وتلاقيها اتطلقت !!!!

➡ **والمشكلة تبقى أكبر من الأول لو معاها أولاد...!**

➡ والأدهى إنها ممكن تكون عايشة عيشة لا تُطاق ! نكد وهم وغم وضرب وخرافات .. ومُجبرة على كده علشان خاطر الأهل أو مش عارفة تتطلق أو لأي سبب كان..! وتلاقيها بتقول ياريتني ما اتجوزت !!

**يا ترى تحبي تتجوزى وتبقى دي عيشتك ؟؟؟؟!**



« تأملی الحديث ده کویس علشان تعرفی لیه ربنا بیرزق المتبرجات واللی مش بیصلّوا واللی بیعصوه لیل نهار ..! »

► قال النبی ﷺ : « إذا رأیت الله ﷻ یعطى العبد من الدنيا ما یُحب ، وهو مقیم على معاصیه ؛ فإنما ذلك منه إستدراج ، ثم تلا النبی ﷺ قول الله ﷻ :

{ فَلَمَّا نَسُوا مَا ذُكِّرُوا بِهِ فَتَحْنَا عَلَيْهِمْ أَبْوَابَ كُلِّ شَيْءٍ حَتَّى إِذَا فَرِحُوا بِمَا أُوتُوا أَخَذْنَاهُمْ بَغْتَةً فَإِذَا هُمْ مُبْلِسُونَ } «

◀ یعنی ربنا بیستدرجهم بالنعم وهما مش حاسیین .. ربنا یتوب علینا وعلیهم قبل فوات الأوان ..



ثانیاً : إوعی علشان کبرتى فى السن أو زواجك إتاخر ، أول ما عریس یجیلک ترضى بیه لو كان غیر ملتزم ..! إنتی ممکن تتنازلی عن أى شئ .. فلوس ، ذهب ، فرح ..

◀ إنما الدین لأ .. کله إلا الدین !!

♥ إحنا عایزین عریس صالح یاخذ بإیدک للطاعة ویعیش معاکى بالمعروف ویعاملك زی ما النبی ﷺ کان یعامل زوجاته .. وتربوا ذریة صالحة تكون صدقة جاریة لیکم بعد وفاتکم بإذن الله ...



♥ عايزين حياة هادية ومستقرة وكلها تسامح ورحمة ومودة ، و كل ده مش هيتحقق إلا مع واحد فاهم دينه وفاهم إزاي كان حبيبنا ﷺ بيتعامل في حياته كلها ..

⊖ ثالثاً : **إوعى** تفكرى إن كل واحد قالك بحبك وبموت فيكي يبقى صادق ومش بيكذب عليكى؟؟!!!

كان فيه اتنين شباب بيتكلموا .. فلقيت واحد فيهم بيقول للتاني ..البنت (فلانة) أنا زهقت منها خلاص وهديلك رقمها تعيشلك معاها يومين .. التاني قاله ليه بس؟؟؟ ده إنت بقالك معاها كام سنة ووعدتها بالجواز والبنت متعلقة بيك..قاله إنت هتعيش إنت كمان!!إوعى تكون فاكّر إني بحبها بجد ولا ممكن أتجوزها أصلاً؟؟  
**دول يومين بنقضيهم وبنتسلى وغيرنا يستلم !!**

﴿**وللأسف الشديد** .. بنات كتيبيير مضحوك عليهم وعاشين في وهم الحب..الوهم اللي غرقان في بحوره معظم البنات ومش بيفوقوا منه غير بعد كوارث حسيّة ونفسية ؛ ممكن تفضل ملازماهم العمر كله !!

☑ وياريت تقرأي كتابي **(لأنك غالية)** ..  
بإذن الله هتلاقى فيه رد على كل أسئلتك عن الحب ..



## ❖ طيب إيه الحل دلوقتي؟؟؟

أنا زهقت من نفسي خلاص ، ومش عارفه أتصرف إزاي مع بابا وماما ومع الناس؟؟!

### أولاً : مع نفسك :

لازم قبل كل شئ تجديد التوبة لربنا سبحانه وتعالى ..  
ثم .. عايزين قلوبنا تكون مليانة يقين في الله ..

هتقولي : هندخل بقى في كلام الشيوخ يقين وبتاع !

هقولك : ده مش كلام شيوخ يا أختي !

ده كلام ربنا ﷻ اللي خلقنا ويعلم ما فيه الخير لنا .. وكلام  
حبيبنا النبي ﷺ اللي ربنا أرسله رحمة لنا وللعالمين ..  
ده الدين بتاعنا ، اللي هدفه إننا نعيش أحلى حياة ..  
وانتي أكيد عارفة إن من شروط الإيمان ؛ الإيمان بالقضاء  
وبالقدر خيره وشره .. يعنى إيه؟؟

### ☑ يعني كل اللي يقدره ربنا ليا فهو خير ...

يعني اتجوزت ، الحمد لله خير .. الجواز إتأخر شوية ،  
الحمد لله خير .. متجوزتش (لا قدر الله) .. برده الحمد لله  
خير .. لو ربنا كاتبلي عريس يبقى هيجيلي هيجيلي ..

◀ ييجي النهارده .. بكره .. بعد شهر .. بعد سنة ؛ المهم  
إنه هيجي وقت ما ربنا يشاء ..



« أحد السلف كان يقول كلام جميل جداً، يقول :

**( علمت أن رزقي لن يأخذه غيري فاطمأن قلبي )**

✓ يعني رزقي مكتوب من يوم ما اتولدت ..

**محدث هياخذه غيري ، يبقى أشيل الهم لييه ؟؟**

« بل فيه حديث من أعجب الأحاديث .. وأول ما حد يعرفه ، المفروض إنه يغير من تفكيره تجاه الرزق تماماً .. ويبطل يشيل الهم بقى .... يقول النبي ﷺ :

**« لو أن ابن آدم هرب من رزقه كما يهرب من**

**الموت ، لأدركه رزقه كما يدركه الموت »** حسنه الألباني

« يعني الرزق هو اللي بيجري ورا الإنسان علشان يوصله زي ما الموت بيجري وراه ! سبحان الله !

« يعني إنتي عماله تلفي ورا العريس وهو بيلف وراكي !! خليكي واثقة في ربنا إنه هيرزقك .. ده ربنا سبحانه وتعالى أعظم و أكرم من كل ما يتصوره العباد ..

► هتقولي : **طيب لو حد قالي مثلاً إنتي إزاي هتتخطبي أو**

**تتجوزي من غير ما حد يشوفك ؟؟ لازم تخرجي وتلفي وتفرجي الناس على جمالك وإلا مش هتتجوزي !!!**

« هقولك : قوليله أنا عندي يقين إن عريسي مقسوملي

وربنا كاتبهولي من قبل ما اتولد ..



« يجي إزاي دي مش بتاعتي ! دي ربنا سبحانه وتعالى  
 اللي بيسبب الأسباب علشانها .. زي الأكل ما بيجيلي كل  
 يوم وأنا قاعدة في بيتي لحد عندي .. بابا بيحببه .. أي حد  
 يحبيه، المهم إنه بييجي ! كذلك موضوع العريس ..  
 « وإوعي تفكري إنك مهما لبستي أو اتشيكتي أو كلمتي  
 ولاد ورخصتي نفسك إن كل ده هيسرع جوازك ! بالعكس؛

## ❖ إنتي كدا بتضيعي منك دنيا و آخرة!

« تأملي الحديث ده .. قال رسول الله ﷺ :  
 « إن روح القدس نفث في روعي ، أن نفساً لن  
 تموت حتى تستكمل أجلها ، وتستوعب رزقها ،  
 فاتقوا الله ، وأجملوا في الطلب ، ولا يحملن أحدكم  
 إستهطاء الرزق أن يطلبه بمعصية الله ، فإن الله  
تعالى لا ينال ما عنده إلا بطاعته » صححه الألباني

► يعني إوعي علشان الرزق إتأخر شوية تعصي ربنا  
 علشان تطلبه..! خليكى فاكرة كويس ..

( ما عند الله لا يُنال إلا بطاعته )



► بنت هتقول : طيب أنا ملتزمة أو كنت مش ملتزمة وبفضل الله إلتزمت وغيّرت لبسي وحياتي وبقيت بطيع ربنا.. وصبرت كثير وجوازي متأخر برده؟؟؟!

❖ هقولك : **يبقى لازم تعرف إن ده هو الخير ليكي ..**

و والله مش هتترتاحي ولا هتحسي بالسعادة غير لما تكوني راضية ، رضا من القلب ، مش باللسان وخلاص !

❖ **وزي ما قولتلك قبل كده** ، ترضي إنك تتجوزي وتعيشي في همّ وغمّ وجحيم ، وهتتمني ساعتها إنك كنتي تقعدي طول عمرك عانس ولا إنك تكوني إتجوزتي !

☑ عايز الآية دي تنقشها على جدران قلبك :

{ وَعَسَى أَنْ تَكْرَهُوا شَيْئًا وَهُوَ خَيْرٌ لَكُمْ }

وَعَسَى أَنْ تُحِبُّوا شَيْئًا وَهُوَ شَرٌّ لَكُمْ

وَاللَّهُ يَعْلَمُ وَأَنْتُمْ لَا تَعْلَمُونَ {

[البقرة: ٢١٦]

«ربنا بس هو اللي يعلم الخير فين .. وهو أرحم بيكي من أي حد تاني.. لو يعلم إن الجواز خير كان قدّمه ليكي .. ولكنه يعلم إن تأخيرّه هو اللي خير ؛ علشان كده أخره ..

♥ يبقى خليكي فاكرة دايمًا :

( **وَاللَّهُ يَعْلَمُ وَأَنْتُمْ لَا تَعْلَمُونَ** )





## ثانياً : مع الأهل :

الأم والأب .. أكيد فكرهم غير فكرك! ..  
بس بإذن الله ممكن تقنعهم بالكلام اللي فات ده ..  
► هتقولى : بس فيه آباء وأمهات كتير إيمانهم ضعيف  
وبرده مش بيقتنعوا .. أعمل إيه معاهم ???  
◄ هقولك : إصبري عليهم وإوعي تزعلي معاهم أو  
تزعليهم .. وإتعاملي معاهم بكل أدب واحترام ورحمة،  
ومتجادليش كتير علشان متتعبيش .. وإدعى ربنا إنه يهديهم  
ويرزقك الصبر عليهم والبرّ بيهم ..

## ثالثاً : مع الناس :

☑ إوعي تلتفتي لكلام أي حد .. الناس عمرهم ما هيبتلوا  
كلام ، سواء إتجوزتي أو متجوزتيش !!  
☑ سيبني الناس يقولوا زي مايقولوا من هنا للصبح !  
ولا تعبري حد فيهم .. ولا كلامهم كله يهز شعرة فيكي ..  
إنتي مؤمنة وعندك يقينيين وثقة في الله بلا حدود ..  
♥ وأخيراً.. ولكنه ليس بأخير .. بل قبل كل شئ ..  
عليكي بـ **الدعاء** ..

ربنا **عَلِّمْنَا** قال : ( **وَقَالَ رَبُّكُمْ ادْعُونِي أَسْتَجِبْ لَكُمْ** )



► **بنت هتقول :** طيب أنا بدعي ربنا بقالي كام سنة وحاسه إنه مش بيُستجاب ليا ؟؟؟؟؟؟!

❖ **هقولك :** مين قال كده ؟؟؟ لو إنتي فعلاً بتدعي بعد تجديد التوبة وبيقين يبقى دعائك مستجاب مستجاب ..

❖ **بس الإستجابة دي إزاي؟؟** شوفي حديث النبي ﷺ:

« ما من مسلم يدعو ليس بإثم ولا بقطيعة رَحِم ، إلا أعطاه الله إحدى ثلاث :

① إما أن يُعَجَّلَ له دعوته (يعني ربنا يستجيبها له في الدنيا)

② وإما أن يدخرها له في الآخرة

③ وإما أن يدفع عنه من السوء مثلها » صححه الألباني .

☑ وقبل ما تنتهي صفحات الكتاب وتقفليه وتحطيه في درج المكتب زي غيره .. لازم أفكر إن ربنا سترك كتييير وأمهلك كتييير ، وبعثك رسائل كتييييير علشان تفوقي !!  
 ➡ بعد ده كله ؛ لو كمّلت في نفس الطريق ، ،

**يبقى إنتي اللي إخترتي غضب ربنا بإيدكي ..!!**

♥ فووووقي يا أختي وارجعي لربك وقوليله :

☑ **سبت لبسي اللي مش صح علشانك ياربي**

**وهسيب كل حاجة حرام علشانك ياربي**

♥ **بس إنت ترضى يا حبيبي يا الله ..**



## إوعي تيأسي! وإوعي تعصي ربنا علشان الزواج!

♥ ومتشيليش نفسك الهم وتقضي حياتك قاعدة  
منتظرة العريس اللي هييجي ويدق الباب!  
إحنا إتفقنا خلاص إن كل شيء مقدر ومكتوب..  
وإن رزقك هيجيلك هيجيلك لحد عندك.. وعلشان كده:

☑ متوقفيش حياتك على عريس!

هو إنتي عايشة علشان تتجوزي وتخلي وتربي العيال  
وبس؟؟؟؟ - طيب فرضاً مفيش جواز ومفيش عيال ،  
يبقى إنتي كده ملعيش لازمة في الحياة!!

☑ منشيليش الهم ، وعيشي كل لحظة في حياتك  
واسنمنعي بها في طاعة ربك..

☑ وإوعي تنتظري حد أو شيء علشان يسعدك ،  
خلى سعادتك دايماً من جواكي عن طريق صلاتك بربك

◀ إنتي عايزه تتجوزي علشان تعيشي أحلى حياة ..

🌀 وأحلى حياة في طاعة الله 🌀

🌀 www.goodwayinlife.com 🌀

